

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalakkersuisunit saqqummiunneqarpoq:

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinnejarnissaat pillugit inatsisissatut siunnersuummut missingiutip (Nuummi inissiisarfimmi kinguaassiuutitigut pinerluuteqarsimasut katsorsarnejarnissaannut inissanik pilersitsineq, ukiukitsunik pinngitsaalilluni atoqateqarsimasoqartillugu pineqaatissiisutit sakkortusineqarnerat, inissiisarfinni imigassamik aanngajaarniutinillu atuinnginnissamut suliniutit, nikanarsaataasumik ajuallatsitaarujuussuarnermi eqqunngitsuliorfigineqartoq suliassangortitsinngikkaluartoq unnerluussisussaatitaasut pineqaatissiinertaqanngikkallartumik unnerluussisussaatitaanerat, inatsisit unioqqutillugit aningaasatigut iluanaaruteqartarnerup pinerluutinngortinnera, iluanaarutinik arsaarinnissinnaanerup annertusinera, aamma nakkutigineqartussanngorluni eqqartuunneqarnermut atatillugu tarnip pissusiinik ilisimasalimmit katsorsarnejarnissaat peqquneqarneq) Kalaallit Nunaanni Namminersorlutik Oqartussanit akuersissutigineqarnissaat pillugu Inatsisartut aalajangiiffigisassaattut siunnersuut  
(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)**

### Tunngavilersuineq

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinnejarnissaat pillugit inatsisissatut siunnersuummut missingiut Naalakkersuisut tigusimavaat.

Qallunaat Kalaallit Nunaanni akisussaaffeqarfiisa ineriartortinnissaannik qallunaat naalakkersuisuisa Namminersorlutik Oqartussallu suliaqarnerannut atatillugu inatsisissatut siunnersuut suliarineqarpoq. Inatsisissatut siunnersuut allannguutinik arlalinnik imaqarpoq, taakkulu ilaagitut Naalakkersuisut Inatsisartullu kissaataat aamma Kalaallit Nunaanni Eqqartuussiveqarneq pillugu Siunnersuisoqatigiinni oqallisiginnineq tunuliaqtaralugit suliarineqarput.

Inatsisissatut siunnersuummi pingaarnertut tulliuttut ilaapput:

Nikanarsaataasumik ajuallatsitsinermik suliani annertuumik ajornartorsiortitsisuni eqqunngitsuliorfigineqartoq suliassangortitsinngikkaluartoq unnerluussisussaatitaasut pineqaatissiinertaqanngikkallartumik unnerluussisussaatitaanerisa eqqunneqarnissaat inatsisissatut siunnersuutip siullertut siunertaraa, ullumikkut tamaaliortoqarnera taamaallaat inuit ataasiakkaat unnerluussissutigisinnavaat. Naalakkersuisut noqqaassuteqarnerat tunuliaqtaralugu allannguut suliarineqarpoq, taakku Inatsisartut aalajangiiffigaata (UKA 2018/104-ip) ingerlateqqinnejarnerani nikanarsaataasumik ajuallatsitsisarneq pillugu malittarisassat allanngortinnejarnissaat kissaatigisimavaat, taamaalilluni unioqqutitsinerit imaluunniit unioqqutitsinerit annertuut erseqqissumik taaneqartut unnerluussisussaatitaasut pineqaatissiinertaqanngikkallartumik unnerluussisinnaatitaalernerisa ataaniittussanngussammata.

Meeqqanik atornerluisarnerup immikkut iliuuseqarfingeqarnissaa inatsisissatut siunnersuutip aappaattut siunertaraa. Inummik 18-it inorlugit ukiulimmik pinngitsaaliilluni imaluunniit allatigut kinguaassiutitigut atoqateqarsimanerup pineqaatissiissutigineqartarnerisa sakkortusineqarnerisigut tamanna pissaaq. Tassunga atatillugu ullumimut naleqqiullugu pineqaatissiissutigineqartartut 50 pct.-imik qaffanneqarnissaat naatsorsuutigineqarpoq, taamaalilluni iliuuserineqartumut atasumik eqqugaasut kanngunarsarneqarnerat pineqaatissiinermi annertunerusumik ersersinneqassaaq. Tamatuma peqatigisaanik kinguaassiutitigut pinerluuteqarsimasut Nuummi Inissiisarfimmut nuunneqarnissaat inatsisitigut tunngavilerneqassaaq, tassani kinguaassiutitigut innarliisarnerit pitsaaliornissaannut katsorsaanissamut inissat pilersinneqassapput. Inatsisissatut siunnersummi ilaasut taakku kalaallit – qallunaallu suleqatigiissitaata, meeqqat inuusuttullu atugarliortut atugarisaasa pitsangorsaavigineqarnissaannut innersuussuteqarnissamik suliaqartut, innersuussutaannik naammassinnippu. Suleqatigiissitat innersuussutaat nalunaarusiami “Kalaallit Nunaanni meeqqanut inuusuttunullu atugarliortunut pitsaalerusumik suliniuteqarnissaq pillugu kalaallit qallunaallu oqartussaasoqarfiisa assiginngitsunik suliallit akornanni suleqatigiinneq”-mi 2020-imi augustiugaa tamanut saqqummiunneqarpoq.

Tamatuma peqatigisaanik UKA 2019/138-imi Inatsisartut aalajangiinerat siunnersummi naammassineqarpoq, taannalu UPA 2020-imi ulloq 22. maj 2020 akuersissutigineqarpoq, tassani Kalaallit Nunaanni unnerluussisussaatitaasut meeqqanut kinguaassiutitigut innarliisoqarsimatillugu pineqaatissiisarnerit sakkortusineqarnissaannik ujartuinissaat innersuussutigineqarpoq. Taamatuttaaq pinerluttulerinermi inatsimmi § 147 malillugu pineqaatissiisarnermut killissarititaasut qaffanneqarnissaat pillugit, inummut annertuumik navialisitsisinhaasumik pinerluuteqarnermk suliani pineqaatissiisarnerup qaffanneqarnissaata periarfissinneqarnissa siunertaralugu, Naalakkersuisut inatsisinut atuutsitsinermut naalakkersuisumut noqqaassutaannut siunnersuut tulluarpoq.

Inatsisit unioqqutillugit aningaasanik iluanaaruteqartarnermut suliniuteqarneq patajaallisaaviginiarlugu inatsisit unioqqutillugit aningaasanik iluanaaruteqarnerup inerteqqutinngortinneqarnissaa inatsisissatut siunnersummi pingajuattut siunertarineqarpoq. Tamanna Kalaallit Nunaanni Eqqartuussiveqarneq pillugu Siunnersuisoqatigiit aamma naalagaaffiit akornanni suliffeqarfiup Financial Action Task Force-ip (FATF-ip) innersuussuteqarnerisigut pivoq.

Ilaatigut meeqqani 15-it inorlugit ukiulinni arsaarinnissinnaanerup periarfissaqalernissaata,ilaatigullu aanngajaarniutit pillugit inatsisit unioqqutinngortinneqarnimaneranni suliani pisuussutit arsaarinnissutigineqartarnissaasa qulakkeerneqarnissaat, inatsisissatut siunnersummi sisamaattut qulakkeerniarneqarpoq. Allannguutissatut siunnersuut taanna Naalakkersuisut Kalaallit Nunaannilu Politiit kissaateqarnerisigut suliarineqarpoq, tamannalu Kalaallit Nunaanni Eqqartuussiveqarneq pillugu Siunnersuisoqatigiinnut 2019-imi ataatsimiinneranni saqqummiunneqarpoq.

Arsaarinnissuteqartarneq pillugu kalaallit malittarisassaat qallunaat malittarisassaasa asserluinnaringajappaat, kisianni qallunaat inatsisaat malillugit arsaarinnittarneq “iliuutsip

pillarneqaataasussap pillaavagineqarnerani inatsisitigut sunniutit aapparaat”, taamaammallu meeqqanut pillatissinneqarsinnaanermut ukiut ammut killingat ataallugu ukiulinnut atorneqarsinnaalluni, kalaallit nunaannili inatsisit malillugit arsaarinnittarneq pineqaatissiisarnerit allat assigalugit pineqaatissiissutissat pillugit kapitalip ataani takuneqarsinnaallutik taamaammallu meeqqanut 15-it inorlugit ukiulinnut atorneqarsinnaanatik. Pineqaatissiissutissat pillugit kapitalimi arsaarinnittarneq inissinneqarsimammat tamanna paatsuuinermik pissuteqarsimasinnaavoq, aamma eqqartuussiveqarneq pillugu ataatsimiitaliarsiup isumaliutissiissutaani piaaraluni ikkunneqarsimanissa takussutissaqanngimmat, naleqqutinngitsumik inissiisimaneq taanna inatsisisstat siunnersummi iluarsiniarneqarpoq.

Aanngajaarniutit pillugit suliani inatsisit malillugit iluanaarutinik arsaarinnissinnaanerup annertusineqarnissaa peqatigisaanik suliarineqassaaq. Pineqartup pisuussutini inatsisit malillugit pissarsiarisimallugit uppermarsarsinnaanngippagu, inuup immikkut ittumik ingasattumik pissusilimmik anngiortumik eqqussisimalluni eqqartuunneqartup pigisaanik pisuussutinik annertunerusunik arsarinnissinnaaneq periarfissanngussasoq tamatuma kingunerissavaa.

Nakkutigineqartussanngorlugu eqqartuussisoqartillugu atugassarititaasut aalajangiiffingineqarnissaannut atatillugu pinerluttulerinermi inatsimmi inatsisip tunngaviusup erseqqissaavigineqarnissaa inatsisisstat siunnersuutip tallimaatut siunertaraa. Nakkutigineqartussanngorlugu eqqartuunneqartuussisoqartillugu tarnip pissusaanik ilisimasalimmit katsorsarneqarnissaq pillugu piumasaqaatit eqqartuussiviup aalajangersinnaagai, siunnersuut aqqutigalugu aalajangersakkami erseqqissumik takuneqarsinnaalissaq. Ullumikkut taamaallaat pinerluttulerinermi inatsisip nassuaataani tamanna takuneqarsinnaavoq.

Inissiisarfinni imigassamik- ikiaroornartumillu atornerluinerit akiorniarlugit suliniutit aallartinneqarnissaat inatsisisstat siunnersuutip arferngattut siunertaraa. Inissiisarfinni inissinneqarsimasut pulaartuinik misissuinissamik periarfissat annertusinerisigut aamma – taamungaannaq tigooqqaalluni misissuinerit aamma piviusumik pasitsaassinnikkut – imigassartorsimaneq, aanngajaarniutinik atuisimaneq il.il. pillugit inissinneqarsimasut misissuiffingineqarnissaat siunertaralugu, pinerluttunik isumaginnittut suliffeqarfiutaanni tamani inissinneqarsimasut – anersaartortitsinikkut misissorneqarsinnaanerisa quuisalu misissorneqarsinnaanerisa qulakkeerneqarneratigut tamanna pissaaq. Inissinneqarsimasut imigassamik, aanngajaarniutinik il.il. anngiortumik eqqussuinerannut atuinerannullu akiuinariermi Kalaallit Nunaanni Pinerluttunik isumaginnittut sunniuteqarluarnerusumik suliniuteqarsinnaanissaat tamatuma periarfississavaa. 2021-mut aningaasanut inatsimmi Kalaallit Nunaanni Pinerluttunik Isumaginnittut qimmimik ikiaroornartulerisumik pissarsinissaannut aningaasanik immikkoortitsisoqarsimaneranut suliniutit taakku ilassuserneqarput.

Annertuumik imigassartornerup- ikiaroornartumillu atuinerup akiorneqarnissaanik Naalakkersuisut kissaateqarnerannut inatsisisstat siunnersummi ilaatinneqartut taakku

tulluarput, aamma inissiisarfinni, soorlulusooq Inatsisartunut ilaasortap Erik Jensenip UKA 2020/29-kkut saqqummiussaani Inatsisartut aalajangiiffigaanni hashi aanngajaarniutillu allat pillugit pinerluuteqartarnermut suliniutit annertusineqarnissaat pillugit tamanna alloriarnerusoq.

Eqqartuussap inissiisarfimmi qanigisaata suliffigisaani pillatisiaminik atuisinnaanissaata avaqqunneqarsinnaanera, imaluunniit eqqartuussaasoq inissiivimmi sulisumut taassumaluunniit qanigisaanut pinerluuteqarsimappat, najukkap qanittuaniinnissamik tunngaviup avaqqunneqarsinnaaneranik periarfissap annertusineqarneranik inatsisisstatut siunnersuutip arfineq aappaattut siunertaraa. Assersuutigalugu arnat immukkut ittumik arnanut immikkoortortaqarfinnut inissinneqarsinnaanissaannut, tamannalumi Kalaallit Nunaanni pinerluttunik isumaginnittunit ullumikkut sulisaaserineqareerpoq, najukkap qanittuaniinnissamik tunngaviup avaqqunneqarsinnaanera tamatuma peqatigisaanik erseqqissaavagineqassaaq.

### **Naalakkersuisut missingummut oqaaseqaataat**

Ilaatigut Inatsisartuni aalajangiiffisassatut siunnersuutit akuersissutigineqarsimasut tunngavigalugit, ukiuni kingullerni naalagaaffeqatigiinnermi oqartussanut tulleriaarinermi salliutitseqquullugit Naalakkersuisut noqqaassutigisarsimasaannik inatsisisstatut siunnersummut missingiut nassiunneqartoq inatsisinik atuutsitsinermut suliassaqarfimmi pitsanngutissanik arlalinnik imaqpaoq.

Meeqqat inuuusuttullu atugarliortut atugarisaasa pitsangorsaavagineqarnissaat pillugit kalaallit— qallunaallu ataatsimoorussamik suleqatigiissitaata innersuussutinik suliaqartussaasup, innersuussutaasa ilaasa naammassineqarnissaannik siunertaqartumik inatsisisstatut siunnersummut missingummik suliaqartoqareernerera iluatsissimammat, Naalakkersuisut ingammik nuannaarutigaat.

Tamatuma peqatigisaanik inissiisarfinni imigassap hashillu akiorneqarnissaannut suliniutit patajaallisarneqarnissaannik siunertallit inatsisisstatut siunnersummi suliniutaammata Naalakkersuisut nuannaarutigaat. Imigassamik hashimillu atornerluineq inuiaqatigiinni annertuumik ajornartorsiutaavoq, eqqartuunneqareernerullu kingorna tamanna ingerlaannassappat, tamatuma innuttaasunut pitsaasumik ilaalersititseqqinniarnermut periarfissat kigaalaqusersussavai.

Naggataagut pisuni immikkut ittuni nikanarsaataasumik ajuallatsitaanermi equnngitsuliorfigineqartoq suliassangortitsinngikkaluartoq unnerluussisussaatitaasut pineqaatissiinertaqanngikkallartumik unnerluussisinaatitaanerisa equnneqarnissa periarfissinneqarmat Naalakkersuisut nuannaarutigaat, ullumikkummi tamanna taamaallaat inuit ataasiakkaat unnerluussisutigisinnavaat, innuttaasullu aningaasartuuteqartarnerat tamatuma malitsigisarpaa.

### **Pisortani aningaasarsiornikkut allaffissornikkullu kingunerisassat**

Kalaallit Nunaanni oqartussanut soqanngilaq.

Naalagaaffeqatigiinni oqartussaasunut inatsisisstatut siunnersuut aningaasartuuteqarfiunerussaaq. Nuummi inissiisarfimmi kinguaassiutitigut pinerluuteqartunut katsorsaanermik inissat equnneqarnerannut aamma ukiukitsunut kinguaassiutitigut pinerluuteqartut pineqaatissinneqarnerisa qaffaaffigineqarnerannut aningaasartuutaanerusussat

immikkut atassuteqarput. Taakkununnga pinerluttunik isumaginnittut ukiumut 5,0 mio. kr.-inik ataavartumik aningaasartuuteqartarnissaat naatsorsuutigineqarpoq.

**Aningaasaqarnikkut allaffissornikkullu namminersorlutik inuussutissarsiutilinnut kingunerisassat**

Soqanngilaq.

**Innuttaasunut aningaasaqarnikkut allaffissornikkullu kingunerisassat**

Soqanngilaq.

**Tusarniaaneq**

Justitsministeeriaqarfip tusarniaaneq ingerlassimavaa, tassani kalaallit nunaanni oqartussaasut naleqquttut ilanngunneqarsimapput. Siunnersuut piffissami 2021-imi 14. januarimiit 11. februarimut tusarniutigineqarsimavoq.

**Ilanngussat**

1. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allangortinneqarnissaat pillugit inatsisisstatut siunnersuummut missingiut tip imaqarnersiornera
2. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allangortinneqarnissaat pillugit inatsisisstatut siunnersuummut missingiut
3. Oqaaseqaateqarnerit allattorsimaffiat